

Á MESA DO PARLAMENTO GALEGO

O Grupo Parlamentar da Alternativa Galega de Esquerda, ao abeiro do disposto no artigo 112 do Regulamento da Cámara, a iniciativa do súa deputada Yolanda Díaz Pérez, presenta a seguinte **emenda á totalidade, de devolución, ao proxecto de lei de financiamento das formacións políticas e de fundacións e asociacións vinculadas**, polos seguintes motivos:

O grupo parlamentar da AGE presenta con este escrito a emenda á totalidade ao proxecto de lei sobre financiamento das formacións políticas e das súas fundacións e asociacións, texto oportunista e incompleto que presenta un goberno sostido por un partido asediado polos casos de corrupción.

O proxecto semella tan insuficiente nos cambios propostos como continuista nos máis dos aspectos que configuran o actual sistema de partidos e a legalidade electoral, concebida esta para primar unha fonda desigualdade nos recursos para a acción política e social entre os partidos do réxime respecto dos que acreditamos nunha alternativa democrática e republicana; outrosí de desaproveitar a oportunidade de acometer unha radical reforma da norma electoral galega, que permita profundar e ampliar os estreitos e deturpados cauces democráticos vixentes.

Se o artigo seis da Constitución sinala aos partidos políticos como forma de expresión do pluralismo político, concorrentes na conformación e manifestación da vontade popular e instrumento fundamental para a participación política, os mecanismos de financiamento irregular desvirtúan esas funcións e semellan funcionais para disciplinar as renuncias das organizacións políticas partidarias do réxime a defender a soberanía

popular. O corolario desta situación é a súa aceptación da intervención de facto da soberanía nacional proclamada no artigo 1.2 da Constitución pola troika.

O proxecto de lei enmárcase na operación publicitaria do goberno Núñez Feijóo para fuxir da onda de corrupción que atega aos diversos escalóns da súa administración e dentro do propio PP, organización que preside. Proxecto que se contenta co exercicio antipolítico de pór a lente sobre as organizacións políticas para despistar a opinión pública da cerna da trama de corrupción político-empresarial que sufrimos, que non é outra que o correlato necesario dunha política de privatizacións que se acompaña da execrable ética do “enriquecédevos” propia do individualismo posesivo e que practican os partidos do réxime.

Cómpre afirmar que nesta situación de podremia das institucións deste réxime político non todos somos iguais. Unhas organizacións políticas e sociais loitamos para transformar nun sentido de xustiza social a sociedade, xunto cos milleiros de asociacións e entidades de todo tipo, sostendo un combate intransixente coa corrupción político-empresarial, e outros partidos políticos sosteñen un entramado de intereses contrarios ao interese xeral e que lindan en demasiadas ocasións cos tipos delictivos asociados á corrupción.

Ese contexto xeral explica as insuficiencias e renuncias deste proxecto de lei presentado nas vésperas do ciclo electoral máis adverso para o bipartidismo monárquico. Así, o título I – adicado ao financiamento das formacións políticas – amosa as súas notables limitacións. Compartimos a prohibición das doazóns por parte de persoas xurídicas, pero avogamos pola súa extensión a todas as doazóns anónimas, a aquelas que proveñan de entes sen personalidade xurídica e as efectuadas por persoas físicas a partires dun determinado umbral contemplado nunha secuencia temporal de varios exercicios, e entre elas as referidas aos bens inmobles. E botamos en falla na figura do administrador/a electoral que non se perfilen as condicións de honorabilidade das persoas que vaian desempeñar tales cometidos.

Non podemos compartir a falla de radicalidade que ten o proxecto de subvencións para as campañas electorais, porque renuncia a deseñar un modelo de campaña electoral novo, austero, vencellado á realidade da xente traballadora, que enfatice a pedagogía dos contidos programáticos e de valores sobre a mercadotecnia electoral, e que teña no acceso aos medios de comunicación públicos e privados de xeito gratuíto o eixe vertebrador dunha proposta que suprima campañas mastodónticas e onerosas para pagar aos medios privados.

Proxecto de lei continuista porque contempla o pagamento das subvencións sobre o criterio dos escanos obtidos sempre ao traverso dunha lei electoral inxusta e non proporcional, que atenta a aquela máxima da igualdade de todos os sufraxios emitidos, cando tería que atender ao número de votos recollidos, indicador máis xusto e proporcional que o vixente. Ademais de limitar os gastos de funcionamento subvencionables ás labouras dos grupos parlamentares, que en modo algún esgotan a actividade das organización políticas das que son emanación.

No título II, do financiamento das fundacións e asociacións vencelladas ás organizacións políticas, o goberno quere deixar fendas que permitan un financiamento espurio. Para AGE cómpre equiparar o rexime de financiamento destas fundacións ás dos partidos.

O título III precisa ampliar as esixencias en materia da transparencia coa que as organizacións políticas empregamos o diñeiro público e as achegas da nosa afiliación e militancia. Afortalar a capacidade fiscalizadora do Consello de Contas e habilitar neste organismo un sistema de acceso libre e fácil para a cidadanía a toda a documentación contable das organización políticas; sendo público o acceso aos créditos concedidos polas entidades financeiras e as súas condicións, e non permitíndose a condonación de débedas ou intereses. Avogamos pola creación dun rexistro público de doazóns ás organización políticas.

Xa que logo, este proxecto apenas pretende outra cousa que alonxar as pantasma do financiamento irregular do PP e da corrupción política-empresarial que rondan o Elsinor de Monte Pío, pantasma que dada a febleza do contido deste proxecto de lei acechan ao partido do goberno na clave oportunista das eleccións e non pola convicción de que o xeito que tivo de financiarse ate o de agora fora inaceptable en democracia; neste texto legal non hai lugar para o arrepentimento do Laertes galego do PP, o seu contido delata que o seu rei quere seguir a usurpar o loureiro da democracia.

En resumo, Alternativa Galega da Esquerda acredita nun sistema de financiamento das organizacións políticas eminentemente público, que evite que estas poidan restar na obediencia respecto dos intereses privados de tramas empresariais e de prácticas lobistas; sistema de financiamento definido polos criterios de transparencia, eficacia e eficiencia no uso dos fondos públicos recibidos, para desa maneira seren as organización políticas eses elementos necesarios para a mellora das condicións de vida da nosa cidadanía. Polo referido, este grupo parlamentar achega a seguinte emenda á totalidade, de devolución do proxecto de lei do financiamento das formacións políticas e de fundacións e asociacións vinculadas.

En Compostela, a 23 de marzo do 2015.

Asdo. Yolanda Díaz Pérez

Asinado dixitalmente por:

Yolanda Díaz Pérez na data 23/03/2015 14:28:07